

Na osnovu člana 92. Zakona o visokom obrazovanju Kantona Sarajevo (Službene novine br. 43/08), te na osnovu utvrđenog prijedloga od strane rektora Univerziteta, Upravni odbor je na svojoj IV redovnoj sjednici, održanoj dana 05.03.2009. godine usvojio sljedeći

**P R A V I L N I K**  
**o disciplinskoj i materijalnoj odgovornosti studenata na**  
**Internacionalnom Burč univerzitetu**

**I OPŠTE ODREDBE**

**Član 1.**

Ovim Pravilnikom reguliše se disciplinska i materijalna odgovornost studenata na Internacionalnom Burč univerzitetu (u daljem tekstu Univerzitet), odnosno na fakultetima koji se nalaze u sastavu Univerziteta, a naročito:

- povreda obaveza (discipline) studenata,
- disciplinske mjere i naknada štete,
- pokretanje i provođenje postupka utvrđivanja odgovornosti, rokovi, evidencije
- i druga relevantna pitanja.

**Član 2.**

Odgovornost, iz ovog Pravilnika, može biti:

1. disciplinska, uslijed povrede obaveze (discipline) studenata, i
2. materijalna (naknada štete), kada je šteta prouzrokovana

Odgovornost iz stava 1. ovog člana temelji se na krivici učinioca (subjektivna odgovornost).

**Član 3.**

Postupak utvrđivanja odgovornosti je hitan.

Postupak utvrđivanja odgovornosti je javan, osim u slučajevima kada interesi studenta i javnog morala zahtijevaju isključenje javnosti o čemu odlučuje Prorektor za nastavu i studentska pitanja (u daljem tekstu Prorektor).

**Član 4.**

Stručno-tehničke i administrativne poslove vezane za disciplinsku odgovornost i prouzrokovanje štete od strane studenata obavlja Odjeljenje za pravne poslovne u okviru Administrativno-pravne službe.

**Član 5.**

Ukoliko određeno pitanje nije riješeno ovim Pravilnikom, supsidijarno se primjenjuju:

1. opšta pravila o krivičnoj i imovinskoj odgovornosti, i
2. pravila Zakona o upravnom postupku

## **II DOMEN PRIMJENE PRAVILNIKA**

### **1. Lice sa statusom studenata**

#### **Član 6.**

Pravilnik se primjenjuje na fizičko lice koje na Univerzitetu ima status studenta svih ciklusa studija na Univerzitetu.

Status studenta dokazuje se javnom ispravom koju izdaje Univerzitet i odgovarajućim evidencijama koje vode Studentska služba Univerziteta

### **2. Lice koje nema status studenta**

#### **Član 7.**

Na lice koje, u smislu ovog Pravilnika, nema status studenta, a prekršilo je pravilo ili pravila vezana za studiranje koja su utvrđena zakonom, aktima Univerziteta i aktima Fakulteta, primjenjuju se opšta pravila o krivičnoj i imovinskoj odgovornosti koja važe u BiH.

Protiv lica iz stava 1. ovog člana Pravilnika, Prorektor podnosi prijavu nadležnom državnom organu.

## **III POVREDA OBAVEZA/DISCIPLINE STUDENATA**

### **1. Opšta pozivanja na povredu obaveza/discipline**

#### **Član 8.**

Student se može pozvati na odgovornost u slučaju prekršaja (povrede) pravila koje je utvrđeno Zakonom o visokom obrazovanju, Statutom Univerziteta, odlukama organa upravljanja, odlukama Senata i Nastavno-naučnog vijeća Fakulteta, makar taj prekršaj i nije izričito predviđen kao lakša ili teža povreda obaveza studenata.

### **2. Lakše i teže povrede obaveza/discipline studenata**

#### **Član 9.**

Lakše i teže povrede obaveza/discipline studenata utvrđene su Statutom Univerziteta i ovim Pravilnikom.

Kao lakše povrede dužnosti studenata smatraće se posebno:

- nedolično ponašanje u radnim prostorijama Univerziteta, odnosno u prostorima u kojima se održava nastava i ispiti;
- pravljenje izgreda u toku nastave čime se ometa normalan rad nastavnika i saradnika;
- oštećivanje opreme, bibliotečkog knjižnog fonda i druge imovine Univerziteta;
- učešće u političkim okupljanjima i drugim skupovima u prostorima Univerziteta čije je održavanje zabranjeno;

- vršenje drugih aktivnosti kojima se nanosi šteta i narušava ugled Univerziteta, nastavnika i saradnika i drugih radnika Univerziteta i studenata.

Kao teže povrede obaveza smatraće se naročito:

- ispravljanje ili prepravljjanje sadržaja u Upisnici (Indeksu) i drugim ispravama koje izdaje Univerzitet (uvjerenja, potvrde i drugo), falsifikovanje potpisa nastavnika i drugih ovlaštenih lica;
- davanje netačnih podataka organima Univerziteta radi ostvarivanja prava i povlastica koje imaju samo određene kategorije studenata;
- lažno predstavljanje radi polaganja ispita ili izvršavanja drugih obaveza iz nastave u ime i za račun drugih studenata;
- izazivanje težeg nereda u radnim prostorima čime se onemogućava ili znatno otežava izvođenje nastave (predavanja, vježbi, ispita i dr) i drugih programa koje su utvrdili organi Univerziteta i njegovih fakulteta ili stručna udruženja nastavnika odnosno studenata Univerziteta;
- izazivanje nereda u radnim prostorijama čime se onemogućava ili znatno otežava izvođenje ispita, a naročito korištenje nedozvoljenih sredstava, u smislu knjiga, skripti, računara, mobilnih telefona, dodatnih papira, kao i ostalog materijala čiju upotrebu predmetni nastavnik nije izričito odobrio, prilikom izvođenja ispitnih procedura (parcijalni ispit, finalni ispit, kviz itd),
- oštećivanje univerzitetske imovine, neovlašteni pristup univerzitetskim prostorijama, krađa univerzitetske imovine, i td;
- opijanje ili drogiranje u univerzitetskim prostorima, odnosno izazivanje tuče i grubo vrijeđanje studenata, nastavnika i drugih radnika univerziteta.
- vrijeđanje nastavnika, saradnika i zaposlenika Univerziteta.

### **3. Svojestvo u izvršenju povrede obaveze/discipline**

#### **Član 10.**

Povredu obaveze/discipline student može učiniti u svojestvu:

1. izvršioca ili saizvršioca (više lica),
2. podstrekača,
3. pomagača, i
4. prikrivača.

Svojestvo i stepen krivice (krivnje) u izvršenju povrede obaveze utvrđuju se u postupku.

### **4. Mjesto izvršenja povrede obaveze/discipline**

#### **Član 11.**

Povreda obaveze/discipline može biti učinjena:

1. u bilo kojoj prostoriji u zgradi ili zgradama Univerziteta ili u neposrednoj blizini zgrade Univerziteta;
2. u prostorijama ili ispred prostorija u kojima se izvodi nastava;
3. na svakom drugom mjestu, ako se preduzetim radnjama narušava ugled Univerziteta, drugog studenta ili studenata, nastavnika i saradnika ili nekog iz nenastavnog osoblja Univerziteta (npr. Iznošenje neistinitih informacija, podataka);

4. na svakom drugom mjestu, ako se preduzetim radnjama namjeravalo steći neko pravo na protupravan način ili protivpravna imovinska korist (npr. falsifikovanje javne isprave koju izdaje Univerzitet).

## **5. Vrijeme izvršenja povrede obaveze/discipline**

### **Član 12.**

Povreda obaveze/discipline učinjena je u periodu dok lice ima status studenta.

## **6. Primjena pravila na prouzrokovanje štete**

### **Član 13.**

Pravila iz člana 7 do 12. ovog Pravilnika shodno se primjenjuju i na slučajeve prouzrokovanja štete.

## **IV DISCIPLINSKE MJERE I NAKNADA ŠTETE**

### **1. Disciplinske mjere**

#### **Član 14.**

Disciplinske mjere za povredu obaveza/discipline su:

1. opomena, koja se izriče za lakšu povredu obaveza propisanih Statutom Univerziteta.
2. javna opomena, koja se izriče kada je student istovremeno učinio više lakših povreda obaveza ili je više lakših povreda učinio u kratkom vremenu, i
3. isključenje sa Univerziteta u trajanju od jedne (1) do tri (3) školske godine, a izriče se za učinjenu težu ili teže povrede obaveza/discipline iz člana 161. Statuta Univerziteta i člana 9 ovog Pravilnika;
4. zabrana polaganja ispita 2 ispitna roka a izriče se za učinjenu težu ili teže povrede obaveza/discipline iz člana 161. Statuta Univerziteta i člana 9 ovog Pravilnika;
5. zabrana polaganja ispita 3 ispitna roka, a izriče se za učinjenu težu ili teže povrede obaveza/discipline iz člana 161. Statuta Univerziteta i člana 9 ovog Pravilnika.

### **2. Princip individualizacije**

#### **Član 15.**

Prilikom izricanje mjere uzimaju se u obzir, naročito: motivi iz kojih je povreda obaveza/discipline učinjena, posljedice koje je izazvala povreda, način izvršenja povrede obaveza, ranije ponašanje studenata, kao i njegovo ponašanje poslije učinjene povrede obaveza/discipline.

### **3. Naknada štete**

#### **Član 16.**

Odgovornost iz osnova prouzrokovanja štete postoji, ako je radnja učinjena namjerno ili iz krajnje nepažnje.

Naknada prouzrokovane štete obuhvata prostu (stvarnu) štetu u visini stvarnog oštećenja, uključujući i odgovarajuće troškove.

#### **4. Kumulacija sankcija**

##### **Član 17.**

Odlukom o izricanju disciplinske mjere određuje se i iznos naknade štete, ako je šteta prouzrokovana.

#### **5. Šteta učinjena drugom licu**

##### **Član 18.**

Ako je student prouzrokovao štetu na imovini ili licnom dobru drugom licu, Univerzitet ne odgovara za štetu.

### **V POSTUPAK ZA UTVRĐIVANJE POVREDE OBAVEZE/DISCIPLINE**

#### **I NAKNADE ŠTETE**

##### **1. Prijava**

##### **Član 19.**

Prijavu o učinjenoj povredi obaveze/discipline i prouzrokovanju štete, kada je došao do saznanja dužan je podnijeti:

1. svaki student,
2. svaki zaposleni,
3. Prorektor, po službenoj dužnosti, i
4. svako lice koje je angažovano na Univerzitetu.

Prijava se može podnijeti pismeno ili usmeno, i sadrži naročito:

1. ime i prezime studenta ili studenata koji su učinili povredu obaveza ili prouzrokovali štetu,
2. njihovu bližu identifikaciju,
3. opis radnje kojom je učinjena povreda obaveza/discipline ili prouzrokovane šteta uz navodenje mjesta, vremena i načina izvršenja, i
4. dokaze (javnu ispravu, svjedoke, druge dokaze)

Prijava se podnosi neposredno višem rukovodiocu.

##### **2. Pokretanje postupka**

##### **Član 20.**

Postupak za utvrđivanje odgovornosti pokreće Rektor, odnosno prorektor odlukom o imenovanju disciplinske komisije. Komisija iz prethodnog stava može biti imenovana i kao stalna.

Odlukom o pokretanju postupka za utvrđivanje odgovornosti obavezno sadrži podatke iz člana 19. stava 2. ovog Pravilnika.

Odluka o pokretanju postupka lično se uručuje studentu putem Protokola Univerziteta odnosno, uz obavezno uputstvo da može angažovati punomoćnika.

Prije donošenja odluke iz stava 1. ovog člana, Rektor može odrediti da Administrativno-pravna služba provede prethodne radnje u cilju provjere navoda iz prijave i pribavljanja dokaza.

### **3. Rokovi**

#### **Član 21.**

Postupak za utvrđivanje odgovornosti studenta za učinjene povrede obaveza/discipline i prouzrokovanu štetu, ne može se pokrenuti niti voditi:

1. za lakšu povredu obaveze/discipline, po isteku šest (6) mjeseci računajući od dana saznanja za učinjenu povredu ili prouzrokovanu štetu;
2. za težu povredu obaveze/discipline, po isteku dvanaest (12) mjeseci računajući od dana saznanja za učinjenu povredu ili prouzrokovanu štetu.

Apsolutni rok zastare za utvrđivanje odgovornosti studenta za učinjenu povredu obaveze/discipline i prouzrokovanje štete jeste dvanaest (12) mjeseci, računajući od dana kada je učinjena povreda ili šteta prouzrokovana.

Ako učinjena povreda obaveze/discipline ima obilježje krivičnog djela (npr. falsifikovanje javne isprave), apsolutni rok zastare jeste onaj rok koji je krivičnim zakonom utvrđen za to djelo.

### **4. Zakazivanje rasprave**

#### **Član 22.**

Disciplinska komisija zakazuje raspravu za utvrđivanje odgovornosti za povredu obaveze/discipline i prouzrokovanu štetu u što kraćem roku.

Rasprava se zakazuje u prostorijama Univerziteta u toku radnog vremena.

Na raspravu se poziva student protiv koga je pokrenut postupak ili njegov punomoćnik i drugo lice čije je prisustvo neophodno.

### **5. Održavanje (tok) rasprave**

#### **Član 23.**

Usmenu raspravu vodi predsjednik Disciplinske komisije.

Rasprava se ne može održati, ako student protiv koga se vodi postupak, odnosno njegov punomoćnik nije uredno obaviješten.

Usmena rasprava se odvija prema sljedećem redoslijedu:

1. konstatovanjem prisustva pozvanih lica i utvrđivanjem njihovog svojstva (lice protiv koga se vodi postupak, svjedok, vještak, zapisničar i dr.),
2. čitanjem odlukom iz člana 20. ovog Pravilnika,
3. davanjem izjave od strane studenta protiv koga se vodi postupak,
4. provođenjem dokaznog postupka: uvidom u javne isprave, saslušanjem svjedoka, uvidom u odgovarajuće evidencije koje se vode na Univerzitetu, saslušanjem vještaka i dr.,
5. davanjem završnih izjava studenta protiv koga se vodi postupak, i eventualno, njegovog punomoćnika.

Rasprava se odvija postavljanjem pitanja i davanjem odgovora (kontradiktornost postupka). Ako se rasprava ne može završiti na jednom ročištu, zakazuje se novo ročište, najkasnije za 15 dana.

## **6. Zapisnik**

### **Član 24.**

Na raspravi se vodi zapisnik u koji se unose svi relevantni podaci vezani za tok rasprave iz člana 23. stav 3. ovog Pravilnika. Zapisnik vodi lice koje odredi predsjednik disciplinske komisije.

## **7. Dostavljanje odluke**

### **Član 25.**

Odlukom, kojom se odlučuje o disciplinskoj mjeri i naknadi štete, donosi Rektor u formi pisanog rješenja, najkasnije osam (8) dana nakon zaključenja rasprave, na osnovu prijedloga Disciplinske komisije.

Rješenje iz stava 1. ovog člana sadrži, naročito:

1. ime i prezime studenta protiv koga se izriče mjera i podaci o njegovoj identifikaciji,
2. opis učinjene radnje, mjesto, vrijeme i način izvršenja
3. vrstu disciplinske mjere i iznos naknade štete, ako je student proglašen krivim,
4. obrazloženje rješenja,
5. pouku o pravnom lijeku i rok za podnošenje žalbe, i
6. potpis Rektora i pečat Univerziteta, sa brojem i datumom rješenja.

Ako je student oslobođen od odgovornosti ili je postupak o utvrđivanju odgovornosti obustavljen, u dispozitivu rješenja se navodi izreka o tome uz sve ostale elemente iz stava 3. ovog člana.

Rješenje iz stava 1. ovog člana uručuje se lično studentu putem Protokola Univerziteta, ako je to moguće, u protivnom, primijenit će se odredbe Zakona o upravnom postupku.

## **8. Žalba**

### **Član 26.**

Protiv rješenja iz člana 25. ovog Pravilnika student može, lično ili putem svog punomoćnika, uložiti žalbu Upravnom odboru Univerziteta, kao drugostepenom organu.

Žalba se ulaže, najkasnije osam (8) dana, računajući od dana prijema prvostepenog rješenja.

Upravni odbor može prvostepeno rješenje: potvrditi ili preinačiti ili poništiti, u cijelosti ili djelimično.

Odluka Upravnog odbora Univerziteta je konačna.

## **9. Primjena pravila o upravnom postupku**

### **Član 27.**

Na postupak utvrđivanja odgovornosti studenata primjenjuju se odredbe Zakona o upravnom postupku, ako u ovom Pravilniku nisu predviđena procesna pravila.

## **10. Evidencije**

### **Član 28.**

O izrečenim disciplinskim mjerama i naknadi štete vodi se posebna evidencija, koju ustrojava Prorektor.

Evidenciju iz stava 1. ovog člana vodi Studentska služba Univerziteta.

## **VI PRELAZNE I ZAVRŠNE ODREDBE**

### **Član 29.**

Postupak koji je pokrenut protiv studenta prije dana stupanja na snagu ovog Pravilnika okončat će se prema odredbama ovog Pravilnika, ako je on povoljniji za studenta.

### **Član 30.**

Ovaj Pravilnik stupa na snagu osmog dana poslije dana njegovog objavljivanja na oglasnoj tabli Univerziteta.

Izmjene i dopune Pravilnika vrše se na način i po postupku predviđenom za njegovo donošenje.

Tumačenje Pravilnika i pojedinih njegovih odredbi vrši Upravni odbor Univerziteta.

**PREDSJEDNIK UPRAVNOG ODBORA**

**Fatih Gursoy**

Broj: \_\_\_\_\_

\_\_\_\_\_

Sarajevo, 05.03. 2009.